



REPUBLIKA E SHQIPËRISË
AUTORITETI I KONKURENCËS
KOMISIONI I KONKURENCËS

VENDIM

Nr. 616, Datë 02.05.2019

“Mbi autorizimin e përqendrimit të realizuar nëpërmjet krijimit të një ndërmarrje të përbashkët, me funksione të plota (Joint Venture) nga shoqëritë Rockwell Automation Diamond Holdings Inc., Rockwell Automation Diamond Foreign Holdings Inc., Schlumberger Technology Corporation, Cameron International Corporation dhe Schlumberger B.V.”

Komisioni i Konkurrencës me pjesëmarrjen e:

Znj. Juliana LATIFI	Kryetar
Z. Eduard YPI	Zv/Kryetar
Znj. Leida MATJA	Anëtar
Znj. Adriana BERBERI	Anëtar
Z. Helidon BUSHATI	Anëtar

Në mbledhjen e tij të datës 02 .05. 2019, shqyrtoi çështjen me:

Objekti: Autorizimi i përqendrimit të realizuar nëpërmjet krijimit të një sipërmarrje të përbashkët, me funksione të plota (Joint Venture) nga shoqëritë Rockwell Automation Diamond Holdings Inc., Rockwell Automation Diamond Foreign Holdings Inc., Schlumberger Technology Corporation, Cameron International Corporation dhe Schlumberger B.V.

Baza Ligjore: Ligji Nr. 9121, datë 28.07.2003 “Për Mbrojtjen e Konkurrencës”, i ndryshuar, nenet 2; 10; 12, neni 24, germa d; dhe nenet 53-64. Rregullorja “Për zbatimin e procedurave të përqendrimit të ndërmarrjeve”, Udhëzimi “Mbi procedurat e thjeshtuara për trajtimin e disa përqendrimeve” dhe formulari i njoftimit të përqendrimit”

Komisioni i Konkurrencës, pas shqyrtimit të relacionit të Sekretarit të Përgjithshëm si dhe raportit të Drejtorisë së Analizës dhe Metodologjisë së Tregjeve, mbi njoftimin e përqendrimit në lidhje me krijimin e një sipërmarrje të përbashkët, me funksione të plota (Joint Venture) nga shoqëritë Rockwell Automation Diamond Holdings Inc., Rockwell Automation Diamond Foreign Holdings Inc., Schlumberger Technology Corporation, Cameron International Corporation dhe Schlumberger B.V.

VËREN SE :

Procedura dhe transaksioni

Pranë Autoritetit të Konkurrencës është depozituar dokumentacioni përkatës në lidhje me transaksionin që konsiston në krijimin e një ndërmarrje të përbashkët, me funksione të plota (joint venture Sensia) nga shoqëritë Rockwell Automation Diamond Holdings Inc., Rockwell Automation Diamond Foreign Holdings Inc., Schlumberger Technology Corporation, Cameron International Corporation dhe Schlumberger B.V.

Pala 1 Rockwell Automation Diamond Foreign Holdings Inc., është një shoqëri e krijuar sipas legjislacionit të Shteteve të Bashkuara të Amerikës, e kontrolluar drejtpërdrejtë nga Rockwell Automation INC.

Pala 2 Rockwell Automation Diamond Holdings Inc., është një shoqëri e krijuar sipas legjislacionit të Shteteve të Bashkuara të Amerikës, e kontrolluar drejtpërdrejtë nga Rockwell Automation INC.

Pala 3 Schlumberger Technology Corporation, është një shoqëri e krijuar sipas legjislacionit të Shteteve të Bashkuara të Amerikës. Aktiviteti kryesor i saj është ai në fushën e shërbimeve të naftës dhe është entiteti kryesor i Schlumberger që ushtron aktivitetet në Shtetet e Bashkuara të Amerikës.

Pala 4 Cameron International Corporation, është një shoqëri e krijuar sipas legjislacionit të Shteteve të Bashkuara të Amerikës e cila ofron produkte të pajisjeve të rrjedhjes, sisteme dhe shërbime të industrisë së naftës dhe gazit në mbarë botën.

Pala 5 Schlumberger B.V., është një shoqëri me përgjegjësi të kufizuar e krijuar sipas legjislacionit të Hollandës. Objektivi i kësaj shoqërie është të veprojë si shoqëri e ndërmjetme holding dhe financiare dhe të ofrojë shërbime administrative dhe menaxhimi për shoqëritë e grupit, si dhe të angazhohet në kërkime shkencore dhe aktivitete inxhinierike.

Palët e mësipërme do të krijojnë një shoqëri të përbashkët, me funksione të plota (joint venture), të quajtur **Sensia**.

Sensia do të jetë një shoqëri e krijuar rishtaz sipas legjislacionit të Shteteve të Bashkuara të Amerikës, me objekt aktiviteti në ofrimin e automatizimit të integruar digjital dhe të zgjidhjeve informative për klientët në industrinë globale të Naftës dhe Gazit Natyror.

Palët në transaksion plotësojnë kriteret e përcaktuar në nenin 10, pika b) dhe nenin 12, pika 1 të Ligjit Nr. 9121, datë 28.07.2003 “Për Mbrojtjen e Konkurrencës”, i ndryshuar dhe si rrjedhojë ky transaksion është objekt autorizimi nga Komisioni i Konkurrencës.

Vlerësimi i përqendrimit

Referuar nenit 3, pika 7, të Ligjit Nr. 9121, datë 28.07.2003 “Për Mbrojtjen e Konkurrencës”, i ndryshuar, si edhe Udhëzimit Nr.76, datë 07.04.2008 “Për përcaktimin e tregut përkatës”, si dhe duke marrë në konsideratë natyrën e transaksionit, tregu përkatës i produktit është lënë i hapur. Tregu përkatës gjeografik do të konsiderohet territori i Republikës së Shqipërisë.

Transaksioni i njoftuar është krijimi i një shoqërie të përbashkët, me funksione të plota (joint venture Sensia), nga Schlumberger Technology Corporation, Cameron International Corporation, Schlumberger B.V., Rockwell Automation Diamond Holdings dhe Rockwell Automation Diamond Foreign Holdings.

Rockwell Automation Diamond Holdings dhe Rockwell Automation Diamond Foreign Holdings nuk janë prezentë dhe nuk kanë realizuar të ardhura në Shqipëri.

Schlumberger Limited është prezente në Shqipëri nëpërmjet shitjes së disa produkteve dhe shërbimeve të caktuara në fushën e naftës dhe gazit si, valvulat e projektuara për projektet e tubacioneve të naftës dhe produkteve mbështetëse për aktivitetet e shpimit dhe në një masë më të vogël ka realizuar shitje përmes shërbimeve të marrjes dhe interpretimit së të dhënave gjeofizike dhe softuerëve të inxhinierisë së naftës.

Përqendrimi nuk do të krijojë mbivendosje ose marrëdhënie të rrjedhës së sipërme apo të poshtme midis aktiviteteve të palëve në nivel kombëtar dhe ky transaksion nuk do të sjellë asnjë ndryshim në tregun shqiptar.

PËR KËTO ARSYE:

Komisioni i Konkurrencës, në bazë të nenit 24, shkronja d dhe nenit 56 pika 1 të Ligjit Nr. 9121, datë 28.07.2003 “Për Mbrojtjen e Konkurrencës”, i ndryshuar,

VENDOSI:

1. Të autorizojë përqendrimin e realizuar nëpërmjet krijimit të një sipërmarrje të re, të përbashkët, me funksione të plota (joint venture Sensia) nga Rockwell Automation Diamond Holdings Inc., Rockwell Automation Diamond Foreign Holdings Inc., Schlumberger Technology Corporation, Cameron International Corporation dhe Schlumberger B.V.
2. Ngarkohet Sekretari i Përgjithshëm për njoftimin e palëve dhe dërgimin e vendimit pasi të bëhen pagesat që parashikon rregullorja “Për caktimin e shpenzimeve për ndjekjen e procedurave pranë Autoritetit të Konkurrencës”.

Ky vendim hyn në fuqi menjëherë.

KOMISIONI I KONKURRENCËS